

PAAVORO ITIONCAJIAJINIRI CORINTOQUITICA

Antsatantaquemparoca

Ocatica iroguenti antsatantaquemparoca mavitetapojatsica itioncacaantaqueca Paavoro itioncajiaquenerigueti tsaroventajiacarica Jesoshi choocajianquitsica gunteninintsiqui pajitatsica Corinto. Iriraquea Paavoro iriovetaca jorio, cotanquitsi irio itigarancane Jesoshi tsavetantimojiaquerica teeca irijorijoigueji itsavetantimojiaqueri Quenquetsatsarentsi Oganejencatatsica, teetarite inquemisanta-jigueroji jorio itsavetantimojiavetacanarica. Irocashi itioncacotaqueri irira Paavoro otsipaqui paperiqui (Ya. 7.57–8.1; 9.1–31; 13.1–28.31), aisa itioncacotaqueri ichoocaquegueti Paavoro Corintoqui otsapaqui Ya. 18.1–18. Tequeratagueti intioncacaanteroji ocatica Paavoro, itioncacaan-quero otsipapae mavite paperi itioncajiaqueneri choocajianquitsica gunteninintsiqui pajitatsica Tesaronica aisa itioncacaantaquero iroquetica paperi itioncajiaquenerica Corintoquitica. Itioncacaantaquero ocatica paperi ajagantsini 55, otsipatapojacagueti iquenaguetanaquegueti quepatsipaequi itsavetantavaequerigueti Jesoquirishito. Iquenquejajitaque itioncacaantaquero guiteninintsiqui pajitatsica Piripo choocatatsica Maseroniaqui (Ya. 20.1–2).

Ocaniqui paperiqui itsavetanqueroquea Paavoro quero icojiaquerini Aapani Irioshi aventajacarica Jesoshi iramenajiaqueriniji quempetaca tee incovaeguishetimatemtempaji. Icanti Paavoro itsatacaajiaqueri iroomajatatsica ichoocatimoji-aquerigueti Corintoquitica, cotanquitsi imaica chooca tsatacaantamampeajatsica ontaniqui tsatacaantantajiguiroca teeca iroomajateji, icanta-jiavetaca itsavetacojiaqueri Jesoshi. Iriatimpajia icantashijiacari Paavoro teequea irio itigarancane Jesoshi. Niganquiquea itioncacaantajiaquerica Paavoro icamantajiaqueri quemisantajatsica incapiocajiaqueri imentaquitsitepae iramita-cojiaqueriniji quemisantajatsica coguitejacojian-quitsica (cap. 8–9).

¹ Naroguenti Paavoro itigarancane Jeso quirishito, iriotari nintacaaquena Aapani Irioshi. Imaica noninque nontioncajiaquemriquea aviatimpajia Corintoquitica tsaroventajiacarica Aapani Irioshi aisa maasano igomajamajarejia choocatantaguetaroca Acaya. Iriguenti notsipataca apitsaroventariteni Timoteo.

² Namanacoventajiaquemriquea incav- intsajamajajiaquempinijite Aapani Irioshi aisa Amajirote Jeso quirishito, inchoocat- acaajiaquempinijite cameetsa aatonijite pishoshoventajigaro taaca opajitapae.

Ishinetacagari Aapani Irioshi atsipejiatsica

³ Jaameshiatsi ashineventajiaquemriquea Irioshite Amajirote Jeso quirishito, iriotaque aisa Iriri, ancanqueriquea: “Poganejencamajata”, ipintsatacomajajiacaji yoguishinejajiacaji

⁴ atsipevaejiacagueti cameetsanijite agavejaji-aquenijite oguishinejajiaquerinijite itsipapae atsipevaetanquitsica anquempejiaquempari iriatimpa yoguishinejajiacajigueti.

⁵ Quejetacaquea atsipejiaca atsipajajajarigueti Quirishito, ari onquejetacaquempa aisa iroguishinejavaejiacaji iriatimpa. ⁶ Oraquea natsipejiacagueti naatimpajia iroguenti cameetsanijite iroguishinejajiaquempinijite aviatimpajia, aisa iroguentinijite irimeshi-mentajaqueempiniji. Ariquea oquejetaca aisa yoguishinejajiaquenagueti Aapani Irioshi iroguenti cameetsanijite pintsatimentajaueniji ariquea inquejetacaajiaquempi aviatimpajia aisa iroguishinejajiaquempi iramenajiaquempigueti pantsipevaetaquempaquea pinquempejiaquenaquea naatimpajia natsipevaetagueti. Iroguenti iroguishinejajiaquempiquea iroonijite pantsipevaetantanaquemparoca.

⁷ Notsamajajiaquequea pinquejejiaquenagueti pantsipejiaquempagueti, ariquea pinquejejiaquena naatimpajia aisa iroguishinejajiaquempiquea Aapani Irioshi.

⁸ Imaica, napitsaroventarijiate, nonintajiaque pintsajiaquequea natsipevaecaquea Ashiaqui namenajiaque aricaca nometojajiaque, namenajiavacaquea teequeate nagavejajajeji nontampishitashijiajeroji.

⁹ Noquenquejantavetacaca: “Imaicashiatsi nometojavaeteni.” Cotanquitsiquea iroguenti oquejetacaquea imaica cameetsanijite nontsamajajiaquenijite aatoquea inchiquiojiquea naatimpa nagavejajiguitsi nontampishitashijiaquero,

iriguenti naventajiaquempa Aapani Irioshi tancoretancoreitirica metojajiavetatsica.

10 Ariquea iriatimpa yompejiaquenaquea, jero teeca nometojantajiguempaji. Ariquea inquejetanaquempa imaica irompejianaquena. Notsajiaquequea icocaniquea iramitacojiaque-naquea taaca opaji nantsipevaequempaca.

11 Pamijiaquenaquea aviatimpajia pamana-coventajiaquena. Iroshequiavaequegueti amanacoventajiaquenaca, ariquea onquem-petaquempaquea aisa incaramirincavaequequea shineventajiaquemparineca Aapani Irioshi iramenajiaquegueti icavintsajamajajiaquena, incankequea: “Ariotesaa.”

Quero ococani teeca iroantempajia Paavoro Cor-intoqui

12 Noshinevaejiacaquea nocanca name-najiaquegueti nococani nocomajamajajiaca acaniqui quepatsiqui, aisa teequea na-mataajiguempaji, pamenamajajiaquenaquea aviatimpajia noguintenitimojiaquitimpigueti. Cotanquitsiquea noquejejiacaguetai imaica, teequea noguijatacojigueroji itsatica caquinte, manaquea icavintsajaquena intati Aapani Irioshi yagavejacaantaquenaca. **13** Oraquea notioncajiaquempigueti maasanopae tee nomanacaguemparoji aatonijite omanapitsajiguimpitsi pampatsajavantajiaquerogueti, manaquea pinquemamajajiaavaquero, nonin-quetari **14** pintsamajajiaquenaquea querocaca nococani naatimpajia. Pitsajiavequena capichaji,

noninque pintsamajajiaquenaquea cameetsanijite pishineventamajajianaquenanijite oncoramanitapoja jegueti incoraquetajategueti Amajirote Jesoshi, pinquempejiaquenaquea naatimpajia noshineventajiaquempigueti.

¹⁵ Irootaquequea nopintsatantavecaca iroaqueragueti aviquetime nonejajijaateme, cameetsaniji pishinevaequempaniji mavite narejetimotajatempime. ¹⁶ Nopintsaveca noanaquegueti Maseroniaqui ariquea noncoraquetaquemequea oraniqui narejetimojiapanajantempimequea aviatimpajia. Iroompa noanajegueti ari narejetsitimopanajantempimequea aisa. Iroompaquea aisa noquenquejavecaquea nonchoocaquemegueti oraniqui nonquenapojequea aviatimpajiaqui noanaquequea Joreaqui pincavintsajajiajavajena pojocajiajavajena noncoguitejacoquempaca, ariquea pamenajiavajena. ¹⁷ ¿Nopintsavecagueti arimpate tee nonquenquejamajateroji? ¿Arimpate noquejejiacari teeca intsaroventempariji Aapani Irionshi icantajiguigueta manaquea icantashitatiajivajiro intati teequea irinetsanajigueroji? ¹⁸ Cotanquitsiquea Aapani Irionshi teequea inquempetempajimaica, manaquea inetsanamajatiro icanqueca, ariquea noquempejiaca naatimpajia, teequea namatavijanteji, nocanquegueti: “Jeeje”, teequea noncantashitempaji aisa: “Tee.” ¹⁹ Ariqueate iquejetacaquea aisa Jesoquirishito, Iriganite Aapani Irionshi, notsavetacotaqueca

naatimpa notsipatashijiacarigueti Shirivano*
 aisa Timoteo notsavetantimojiaquempigueti
 aviatimpajia. Pinquenquejerija iriatimpa
 queroca icanque icocani inetsanamajatiro.
 20 Aisa oraqua icoraquequitigueti iroguenti
 netsanamajajiqueroquea maasanopae icanqueca
 Aapani Irioshi paesatoniqui icanquegueti
 intigarancaqueri Meshiantanquitsineca.
 Irootaquequea imaica ashineventantajiacarica
 Aapani Irioshi acanqueriquea: “Ari netsana”,
 atsajiaquetari iriguenti Jesoquirishito
 quempetacaaguecaroca. 21 Iriotarite
 Aapani Irioshi tsaroventacaamajatacrajiri
 Quirishito, naatimpajia aisa aviatimpajia,
 cameetsanijite aguijamajaqueriniji aatoniji
 oguipaquijajiguirotsi atsarоventajiacarigueti.
 Icoguiajiacaji. 22 Ariquea oquejetaca iseyotacaji
 ocanque aatimpajia irashimajaca, jero
 itigarancantacajirica Ishire inchoocashirenta-
 jiapojacaji cameetsanijite antsajiaquenijite
 irinetsanamajajacajiro maasanopae icanqueca.

23 Imaica pamenajiaque teequea nogueji
 oraniqui Corintoqui namenajajatempime,
 teetarite nonintejи noshimampojancaca-
 jiapojempi, nopintsatacojiaquempitarite.
 Yamenaqueaquea Aapani Irioshi teequea
 namatavijajiguempiji arimajacatari nocanque.
 24 Teequea irooquea nonintajigueji noncan-
 quempiquea pinquemisantamajajiaquenaja
 naatimpajia pinetsanamajajiaqueroquea
 nocantajiaquempica, iroguenti noninta-

* 1:19 Iriraquea Shirivano icantajitiri aisa Tsirashi.

majajiaque nontsatacaa jiaquempiro quea
 otsipapae cameetsanijite pincoguitempa nini jite
 pishinevae jiaquempanijite, iroorijite
 pa ventaventa icarigueti Aapani Irioshi
 pitampishi rentantajianacaca.

2

¹ Irootaque quea noquenque jantacaca aatotaja
 noguitsi namenajiajate mпи cameetsanijite
 aatonijite noshimampo jancaca aajiguimpitsi
 ariquea noshimampo jancana queempaquea
 naatimpa aisa. ² Namenaquetari arigueti
 noshimampo jancaca aajiaquempi, ¿quericampate
 oguishinejanajenane ca? Aparo picojiaca quea
 aviatimpajia poguishinejajia quena quea, cotan-
 quitsiquea arigueti noshimampo jancaca aajiaque-
 mpi ¿querocampate noncotajempani naatimpa
 noshinetantajempaca? ³ Irootaque quea
 notioncantajiaquempica nocantajiaquempi
 pincomajamajajiana quempaja, namena quequea
 noncoraquevetajiaquempagueti manaquea
 pishimampo jancaca aajia quena quea, teetarite
 iroo quea noninteji onquempetaquempaquea
 imaica, iroguentiquea noninque poguishine-
 jajia quena quea naatimpa cameetsanijite
 pishinetimentajiaquempanijite aviatimpajia
 aisa. ⁴ Ora quea notioncajiaquempigueti
 coramaniqui taaja noshimampo jancava eca quea
 nocanca noquenque jaco jiaquempigueti,
 niganquiquea niraanaca. Cotanquitsiquea
 tee quea iroo quea nontionquimentajiguempiji
 noshimampo jancaca aajiaquempiniji, iroguenti

noninque pintsajiaque caaviji nopintsamajaji-aquempiquea.

Icantajiaqueri impeacojajemparijate peacaan-quitsica covaeguisherentsi

⁵ Iriraquea peacaanquitsica covaeguisherentsi teequea aparo irishimampojancaguenaji naatimpa, aviguentijiamaja ishimampojanca-caajiaquempiquea, cotanquitsiquea teequea noninteji noncanque caaviji ishimampojanca-caamajajiaquempi, teequea noninteji nontiavaetatacantempiro. ⁶ Ariquea picapiocajiacagueti piconoagarancaquea picantajiaque incantimentajiqueriquea peacaaguishetanquitsica covaeguisherentsi. Itsipapae cantanquitsica aatoja icantimentajitiritsi, cotanquitsiquea iriguenti oshequijianquitsica cantajianquitsica incantimentajiqueriquea, jero piquempejiaqueri imaica. Cotanquitsiquea imaica ariotapoji oncaratapoje picantimentajiaquerigueti.

⁷ Irootaquequea nocantajiaquempica imaica pimpeacojajemparija, aisa poguishinejajajerija aatonijite otiroroncavaetanacari ishimampojancare irishoshoguitevaetanaque. ⁸ Aisa aviatimpajia noncanquempiquea imaica pamenacaajajerija picocani pipintsajiacari.

⁹ Oraquea notioncajiaquempigueti coramani, nocantajiaquempigueti querocaca pincopincoitaquerini, manaquea noninque nontsaque aricaca pinquemisantajiaquenaquea pinetsanamajajiaquero nocantajiaquempica. ¹⁰ Quericaca pimpeacojajempaca aviatimpajia, ariquea nonquejetaquempaquea naatimpa

nompeacotajempariqueate. Teequea querocaca incovetenaji, cotanquitsiquea yamenaque-naquea Quirishito arimajaca nopeacotsitajari, iroorijite nopintsatacojiaquempi. ¹¹ Iroguenti noquempequeroquea imaica cameetsanijite aatoniji ochoocatitsi ompampiatantaquempaca iragavejajiacaji Satanashi, atsamajajiguiritari queroquea icota iriatimpa icocani isemajiacaji iramatavimatavivaecaji.

*Icanqueri iriguenti agavejacaajiaqueri
Quirishito*

¹² Narejetsipojacaguetti Toroashiqui nontsavetanteroniji Quenquetsatsarentsi Oganejencatatsica tsavetacoquerica Quirishito, choocajia icaramirincavaeque nintajian-quitsica nontsavetantimojiaqueri, iriguenti nintacaajiaqueri Amajirote, oquejevetaca yashirejacotaquena Amajirote sotomorontsi. ¹³ Cotanquitsiquea naatimpa noshoshoguitevaeca teequea nontonquivojapojempari apitsaroventarite Tito, ariquea nocantajianajari choocajatiatsica oraniqui noanaquequea Maseroniaqui.

¹⁴ Noshineventajiacariquea Aapani Irioshi, nocanqueriquea: “Arioteesaa”, yagavejacaajiaquenatari nagavejajiaqueriniji maasano catsimatashtarica, notsipamajajiacaritari Quirishito, irootaquequea yagavejacaantajiaquenaca nontsavetacojiaqueriquea iriatimpa, nontsitacaguitechavaetanaqueroquea maasano quepatsi. ¹⁵ Aquempetacaroquea casancajencaro. Iriraquea Aapani Irioshi ishineventajiacajiquea

yamenajiacajigueti atsavetacojiaqueriquea
 Quirishito atsavetantimojiaqueriquea
 irimeshiajiaqueca aisa aatoca imeshiajiti.
¹⁶ Iriraquea aatoca imeshiajiti teequea
 irishineventavaquemparoji, yamenaquero
 quejetaca aajencatiroguedi metojantatsica,
 cotanquitsiquea irirajia irimeshiajiqueca
 ishineventajiacavacaro, oquempetimotacari aajen-
 catirogueti organijantatsica casancajencatatsica.
 Cotanquitsiquea ¿taampate agavejanquitsineca
 intsalventacaajiaquempariquea itsipapae
 aatoguedi irioquea agavejacaguiritsi Aapani
 Irioshi? ¹⁷ Choocajitarite icaramirincavaeque
 amatavijantajatsica manaquea itsavetantamam-
 peajiacaroquea intati, inintajiaque iraantaji-
 aquemparo imentaquipae. Cotanquitsiquea
 naatimpajia teequea nonquempejiguempariji
 iriatimpajia, manatarite itigarancajiaquenaquea
 Aapani Irioshi nontsavetantajiaquero Iguen-
 quetsatsare. Itsaquequea iriatimpa arimajaca
 nocantamajaque teequea namataguempaji,
 iriguenti agavejacaajiaquena Quirishito.

3

*Irimeshiajiqueriquea maasano tsalventajia-
 quemparineca Quirishito*

¹ Oraquea nocantajiaquempiguedi imaica,
 aricaca pamenajiaque naroguentica semetajatsi
 nocanquegueti cameetsatia nochoocavaejigui.
 Teequea ariquea nonquempejiguempaji
 imaica, aisa teequea noncoguitejacojiguempaji
 nontigarancacaantajiaquempiroquea paperi

itioncacojiquenagueti itsipa icantacojiaquena cameetsatia nochoocavaejigui. Ariquea oquempetaca aisa teequea nonintajigueji pintoncacojiaquenaquea aviatimpajia pintsavetacojiaquena nocomajamajajiacaguetai.

² Aviatimpajiatari piquejejiacaro paperi itioncajitaquenaca, itioncajitaqueca noshirequi, cotanquitsi itsajiaquero maasano, quejetaca yapatsajavantaquero maasano. ³ Manaquea piquejetacaro paperi itioncaqueca Quirishito. Teequea intioncacotenaji paperiqui, cotanquitsiquea itigarancajiaquena notsavetantimojiaquempigueti, ariquea Ishire Aapani Irioshi anijatsica icantashitatiajiaquempi, jero itsatantajiacaca maasano tee namatavijanteji. Teequea intioncacotantajitenaroji mapicotaqui, manaquea oquejetaca iroguenti itioncacojiquena pishirequi.

⁴ Notsamajajiaque nocantajiaquempigueti imaica teequea noncantashitempaji, yame-naquenatari Aapani Irioshi notampaticamaja-jiaqueroquea, iriguentitari agavejacaajiaquena Quirishito noquejetantajiacaca imaica. ⁵ Teequea noncanteji inchiquiojiquea nagavejajiaque naatimpajia nompeacaajiaquempa cameetsaripae, iriguentiquea agavejacaajiaquena Aapani Irioshi. ⁶ Yagavejacaajiaquenaquea ipeacaajiaquena tsavetantiroca iroqueraro

paaquito.* Teenicate onquejetemparoji iroquetinica tioncanquitsica mapicotaqui, ocaticaquea iroqueraro yamaqueroquea Ishire. Oratica tioncanquitsica, aatogueti inetsanajitiro aanaqueri camorecariqui. Cotanquitsiquea Ishire Aapani Irioshi yanijacaanti.

⁷ Coramani itioncajiaquenerigueti Aapani Irioshi ishiraerija maasanopae ininqueca irinetsanajiaqueca iriatimpajia, iroguenti itioncancaro mapicota, iroompaquea yojocaqueneri Moishishini irajaianajeneri. Iroompaquea icoraquevetaja Moishishini ichoocajiaquegueti iriatimpajia tsirencashimpoquierencavaetanaca icanca ivoroqui. Querocampate incohincoitaquempani iramenajiavajerigueti, itsirencajiaapojaqueritari, cotanquitsiquea opeitanaja. Ocaticaquea ocatica itioncajiaquenerica Aapani Irioshi ishiraerija iroguenti oquempetacaantajiaqueri maasano teeca irinetsanamajajigueroji, cotanquitsiquea oraquea yojocaquenerigueti Moishishini manaquea itsirencacaaqueri. ⁸ Oraquea yojocavecanarigueti quempetacaantantatsica ariqueate itsirencashimpoquiererejacaavaequeri, iroompaqueate yonigaimojiacajica Ishire Aapani Irioshi ashirejiaqui caaviji anaavaequeri

* **3:6** Oraquea paaquito iroguenti icantamajajitirica itsipa irinetsanamajajitenerica. Ocaticaquea iroqueraro paaquito icantajiacajiquea Aapani Irioshi irishetacotajeri igovaeguishere maasano aventaventaquemparineca Meshiantatsica metojaventajiacajica. Ochoocaguetaquequea paaquitopae iroquetinica icanquerica Noeni, otsipa icanquerica Averaameni, otsipa icantajiaquerica ishiraerija ichoocajiaquegueti Moishishini, otsipa icanquerica Taavini.

oganejencamajataca, ⁹ otsatacaajiacajitari yamenajiacaji Aapani Irioshi quempeca teeca ancovaeguishetimatempaji. Ocaticaquea ocatica caaviji anaaque oganejencamajataca, anaavaetaqueroquea yamenacaajiaquerica Aapani Irioshi ishiraerijia coramani yamaji-aquenerigueti Moishishini itioncaqueca Aapani Irioshi quempetacaantajiaquerica maasano teeca irinetsanajigueroji. ¹⁰ Oganejencaveca itioncajiaquenerica otsatacaajiavecari quero icotani iriatimpa, cotanquitsiquea caaviji anaavaeque oganejencamajataca yonigaimojaicajica Ishire Aapani Irioshi imaica. ¹¹ Yojocavecanarigueti carapojatsineca itsirencashimpoquirerejacaavaevetacari, imaicampani ¿aatompate oganejencamajatatsi caaviji anaamajaque iroqueraca coguitatsica? Anaavaequeroquea.

¹² Notsajiaque arimaja onquejequempa, irootaquequea notsavetantajiaquegueti noguisotoamajatantacaroca caarica nopashiventacaantataro. ¹³ Teequea nonquempejiguempariji Moishishini iticaacoquerogueti ivoro paañoqui aatoniji yamenajiguirotsi ishiraerijia ompeana-jempatajate otsirencashimpoquirerejanequi. ¹⁴ Manaquea oquejeveca oticaacagueti paaño, icocani ishiraerijia arejevaeca imaica yapsajavantavetacarogueti iroquetinica paaquito itioncanaqueca Moishishini tee intsatacoteroji, quempetaca opaañotacotaca. Tequerataquea impaañorejacojiteriji, iriguentitari Quirishito paañorejacoquerone antsarovenquemparigueti, ironigaajiacajiro. ¹⁵ Yarejetacovaetaca imaica

yapatsajavantajia vecarogueti itioncana queca Moishishini teequea in quemajigueroji, quempetaca ipaañoshirentacoca. ¹⁶ Cotanquitsiquea taacagueta pitsocashitanajemparine Amajirote, impaañorejashirentacotajeri, in quemama jaquero. ¹⁷ Irira quea Amajirote iriota que Ishire. Querica ichoocashirentajia queca Ishire Amajirote tecatsi omperaperaashirentajemparineca. ¹⁸ Ariquea oquejeveca ipaañorejaco jicaji atsirencashimpo quirerejana que itsirencanequi Amajirote, icantashitatanacajitari anquejetanta quemparica iriatimpa, yoganejencatacaanacaji oavaetana que anquejemajatantana quemparica. Irio quea quejetaca acaroca Ishire Amajirote.

4

Paavoro tampatica yo aquero itsavetantavae- querogueti Iguenquetsatsare Aapani Irioshi

¹ Ipint sataco jiaquena Aapani Irioshi in intaca jiaquena quea nontsavetantavae querero Iguenquetsatsare, iroota que quea pam enantajia quena ca teeca no shi mampo jancamajatempa ji, teeca novashiantimajigueroji. ² Tee quea no shine ventempa roji isenacashi hijiguetacaca guipashiv entantatsica. Tee quea namatav itanteji, aisa tee quea noncantashitiguem paroji Iguenquetsatsare Aapani Irioshi. Yam enajia que na queate iriatimpa aisa maasano caquinteji notampaticatacotaquero notsavetanti rogueti iroo majaca. ³ Cotanquitsiquea arigueti omanaca Quenquetsatsarentsi Oganejencatatsica notsavetantajia queca quempetaca ipashicapsajita queri

iguenquejanequi quemajiavetavacaroca, iriguentija omanapitsajiacaroca irirajia peajianquitsineca.

⁴ Iriraquea Satanashi icantajitica “irioshite quepatsiquitica” ishamponcajashirentajiaqueri maasano teeca iraventempariji Quirishito, aatonijite yagavejajiguitsi intsajiaavaquero Quenquetstsarentsi Oganejencatatsica. Quejetacaquea tee irinejeroji tsirencari shiacaroca iroganejencare Quirishito quempemajatacarica Aapani Irioshi. ⁵ Teequea naatimpa tsavetantajatsineca, iriguenti notsavetantajiaque Jesoquirishito nocantajiaque iriguenti Imajirojiate maasano. Nantajiaqueneri Jesoshi jero nocantantajiacaca quempejiaca naroguentijiacaca paajanire, inintacaquenatari namitacojiaquempi. ⁶ Iriraquea Aapani Irioshi irioquea cantanquitsi: “Ontsirenquempaja pitsecamajavetanquitsica”, aisa irioquea tsiren-cashirentacotacaji antsatantajiaquemparoca quero octani iroganejencare Aapani Irioshi otsirencashimpoquiererencavaetanaca ivoroqui Jesoquirishito.

*Quero icoqueroni itsaroventamajatacarigueti
Jesoquirishito*

⁷ Quempetacaquea itejitajirogueti cavorejatatsica oganejencaro chomopitoqui ipeacaantajitacaca quepatsi. Mana noquempejiacaro chomo teeca ovegaramajatempaji, cotanquitsiquea oraquea notsavetanqueca iriguenti oganejencamajaro. Teequea taaca opaji nagavejajiguempaji naatimpajia inchiquiojita, cotanquitsiquea yagavejacaamajaquenaquea

Aapani Irioshi notsavetantajiaquerigueti cameetsaniji intsatimentajiqueroniji teequea inchiquiojita nagavejashijiaquemparoji naatimpajia, iriguenti agavejacaajiaquenaqueate Aapani Irioshi. ⁸ Jero natsipevaevemparoji covaeguishetacaantatsica cotanquitsiquea teequea agavejajiguena, choocatirajana tsavetacotanatsinaqueate Quirishito. Aisa ochoocaveca oshequi noquenquejajiaqueca teeca nontsavetemparoji quero noncoqueroni, cotanquitsiquea tee noshoshoguiteteji. ⁹ Yatsipetacaavaequeunaquea caquintejia, cotanquitsiquea tee intsinampirejenaji Aapani Irioshi. Aisa yoncaracaravaevequena, cotanquitsiquea tee irimetojajiguena. ¹⁰ Querocagueti noanoaitaqueni icatsimacatsimavaetaqueunaquea iquempetacaavaequeuna Jesoshi intajiaque irimetojajiaqueuna, irootaquequea yamenantajicaroca ariquea noquempejiacari natsipevaecaguetai. Cotanquitsiquea iriatimpajia teequea iragavejajiguena, irootaquequea itsatantajitacaroca iriraquea Jesoshi icocani ichoocati, iriguenti agavejacaajiaquenaca. ¹¹ Naatimpajia anijajiajatsica, nocantacoguitani natsipevajejiaca icatsimajiaquenagueti, intavacaquea irimetojajiaquename irooriji noguijatacomajaqueri Jesoshi. Noquejetantajiacaca cameetsaniji namenacaajiaqueriniji maasano teequea inchiquiojita nagavejajigueji naatimpajia, irioquea agavejacaajiaquena Jesoshi notsinometojanequi. ¹² Notsavetantavaequerigueti iroovepojaca irimetojajiquename, cotanquitsiquea aviatim-

pajia piquemisantajiaqueri irootaquequea pinchoocatantajiajempaca pincoguitempani.

¹³ Chooca itioncacojiqueca ocanque: “Notsatajimpi naventanaquempi, irootaquequea noquenquetsatantacaca.”[✳] Irootaquequea noquempetantajiacaca naatimpajia imaica, notsamajajiaquequea caaviji yagavejamajati Aapani Irioshi, jero nontsavetacotantajiacarica. ¹⁴ Naatimpajia notsamajajiaque iriraquea vochatajirica Amajirote Jesoshi imetojavetacagueti inquempetacaajiajenaquea naatimpajia aisa, irivochajiajena intsipatsipaitanajena jenoqui ichoocatigueti iriatimpa, intsipatacaantajiaji ironigaantajiapoajajai.

¹⁵ Aviguentijia natsipeventajiacaca cameetsaniji inchoocajiaqueniji incaramirincatimentanaqueniji incavintsajajiaqueca Aapani Irioshi, iroompaquea inchoocajiaque aisa incaramirincavaequequea cantajiaquerineca: “Ariotesaa”, ariqueate iramenajiqueriquea iriatimpa caaviji icavintsajamajatanti.

¹⁶ Irootaquequea noquempetantajiacaroca imaica teequea noshimampojancamajtempaji. Manaquea natsancotsinojivavetanaca, cotanquitsiquea noshirejiaqui itampishishirentacajitanajana maasano savincaguiteri, ijananeshirentacajitanajana.

¹⁷ Notsajiaque ocatica capichajaniqui natsipevaejiavecaca imaica, taampina ompeanajempa. Ompampiatantanaquempaca noshinevaetantajempaca ontaniqui inquitequi oganejencavaetapojajempa, noncoguitempani

[✳] 4:13 Sar. 116.10.

nonchoocajipojaje, anaavaetajero maasano natsipevaevacaca. ¹⁸ Irootaquequea teeca nonintamajatantajiguemparoji yamenajiguetuica imaina, iroguentiquea nonintamajajiaji teeca iramenajiteji. Maasanotari yamenajiguetuica imaina taampina onteroncaguetanajempa, cotanquitsiquea oraqueate tequerataca iramenajiteji aatotari oteroncatsi, oncoguitempaniquea onchoocaguiteni.

5

Paavoro itsamajaque irimetojanajegueti iroanaje inquitequi

¹ Naatimpajia notsajiaque aricagueti irimetojajiquena oraquea notsinojia imaicatica avejancanajempa, mana onquempetaquemparo isoveajitirogueti quitsaarentsivanco, cotanquitsiquea onchoocataje notsinojia otsipa impeacaajempaca Aapani Irioshi inquitequi, oncoguitempani onchoocaguiteni, aatoquea oquejetajarotsi quitsaarentsivanco ipeacaacaca caquinte. ² Ocaniquiquea ocaniqui quepatsiqui noshimampojancavaeca natsipevaeca nonintantajiacaca incantashitatiajiajenaqueate Aapani Irioshi, onchoocaque notsinojia iroqueraro, onquejetajemparo tsovironaquimajaca inquitequitica. ³ Onquejetajemparo aisa oitsaare noshire, nonquitsaatajempagueti aato nocajarashirentajitsi. ⁴ Oraqueate choocatirajanagueti ocaniqui quitsaarentsivancoqui noshimampojancavaevetacaqueate natsipevaeca, cotanquitsiquea teequeate

irooquea nonintajigueji irisoveajitero, iroguentiquea noninque nonchoocatantapoja jemparo notsovironaquitemajaca inquitequitica. Aritarite choocatirajanagueti notsinoqui teequea nonintajigueji nometojajiaque avejancanajempa notsinojia, iroguenti nonintajia veca nojouquijipanajantero noanoaitanaque inquitequi onchoocaque iroaqueraro notsinojia aatoca oteroncatisi. Ocatica quea ocatica teequea onquishometojaneteji, cotanquitsiquea ontaniquiquea ontaniqui noncoguitempani nonchoocajiaguiteni. ⁵ Iriraquea peacaajiacajica cameetsaniji anchoocajiaguiteni, irio Aapani Irioshi. Iriotaquequea aisa tigarancajiacajirica Ishire, atsatantajiacaca irinetsanamaja querero maasano otsipapae icantaguequeca icanquegueti quero oncotaquempani oncoramanitapoja jegueti.

⁶ Irootaquequea imaica nocantacoguitani notampishishirentanaque. Notsajiaque choocatirajana nochoocajia quegueti ocaniqui notsinojia qui tequeratamajaca nonconoamajatempariji Amajirote. ⁷ Imaica tequerata

namenajiavetempariji cotanquitsiquea notsajiaque oncoramanitapoja jegueti namenajia queri, noquemisantajia queri icanquegueti irajaiana quenaquea iriatimpa qui.

⁸ Irootaquequea teequea nontsaroacajaiguemparoji nometojane, caaviji anaaque oganejenca nojocanajero notsino noanoaitanaque ontaniqui jenoqui nonconoamajapoja jempari Amajirote.

⁹ Irootaquequea nonintamajajia quequea nantajia que inintaguetica iriatimpa cameetsaniji

noshinetacaajiaquemparinijite, arigueti choocatirajanagueti notsinoqui ocaniqui quepatsiqui irooca noanoaitanaque ontaniqui jenoqui nonintajiaque nonquempejiaquempaquea imaica. ¹⁰ Iriraquea Quirishito yamenamajataqueroquea maasanopae taaca opaji antajiaqueca tequerataca ametojajigueji, jero oncoramanitapoajegueti arejetapoajempagueti incapiocantajiajajica maasanojia, ancatintiitimojiaqueri imajirontamentoqui incantajiacaji taaca ontampaticajiacaji maasano, intsitacajiacaji.

Aapani Irioshi yamenajiacaji quempetaca teeca ancovaeguishetimate tempají

¹¹ Nocantacoguitani notsaroacaamajajiacari Amajirote irootaquequea nopanquenapanquenaguitarini maasano caquinteja nontsaroventacaajiaquempari. Iriraquea Aapani Irioshi itsamajatiro arimajaca nocomajamajajiacar notsavetantimojiaquempigueti teequea namatavijiguempiji. Imaica nonintajiaque pintsajiaque aviatimpajia aisa. ¹² Oraqueate nocantajiaque imaica teequeate nonintajigueji naatimpajia semetacojiajatsine noncantajiaquequea noganejencare nocojiaca nantajiaqueneriquea Amajirote, manaquea noncantajiaquempiquea aatoniji pipashiventacaajiganatsija, manaquea pishineventajiaquenaquea cameetsaniji pagavejajiaqueniji pimativicacajaiqueri irirajia cantimanajianaca. Iriatimpajia isemejiaque, cotanquitsiquea manaquea

itsaroventamampeajiaca intati. ¹³ Oraqueate yamenajiaquenagueti iriatimpajia manaquea noshoncacojiaca, teequea noshoncacojiguempaji, iroguenti nantajiaguitinirini Aapani Irioshi noshinetacaajiaquemparinijite. Oraqueate notsatacaamajajiaquempigueti aviguentijia noquenquejacojiaqueca cameetsaniji pintsaroventamajajianaquemparinijite Aapani Irioshi. ¹⁴ Ipintsamajajiaquenaquea Quirishito icavintsajamajajiaquenaquea, irootaquequea tigarancavaquenaca. Oraqueate imetojaventajiacajigueti Quirishito quempetaca aricaca ametojajiaque aatimpajia. ¹⁵ Imetojaventajiacaji maasano cameetsaniji imaica aatimpajia yanijashirentacaajiaqueca aato asavicaventajajiro anintajiaqueca, iroguenti asavicaventajiaque inintagugetica iriatimpa metojaventajiacajica ariquea ipochatanaji. ¹⁶ Irootaquequea teeca namenantajiguemparica itsipajia quejetaca yamenajiaqueri teeca intsaroventempariji Aapani Irioshi, teequea irooqua noshineventimentempariji aricaca yanaajencavaevetaca irooca tee. Ariquea noquempetacaajiavecari Quirishito coramani manaquea namenajiavecari tee iriomajateji, cotanquitsiquea teequea nonquempetajempaji imaica. ¹⁷ Irootaquequea noncantantajiaquempica imaica iriraquea tsipashirentacarica Quirishito imaica, iroaquerashiretanaji icantanaja. Teequea inquempetajempaji coramani, icantashitayanajatari, maasano iroaqueratimotanajiritari.

¹⁸ Iriotaquequea quempequeroca Aapani

Irioshi imaica. Itigarancaqueri Quirishito iraa-jiavajajinijite, yovetsinrantajiajajica. Imaica inintacaajiaquenaquea nontsavetantimojiana-queri maasano irovetsinrantajiajemparica.

¹⁹ Itigarancaqueriquea Quirishito coramani acaniqui quepatsiqui irovetsinrantajiaqueriniji quepatsiquitica cameetsaniji iramenajiaqueriniji quempeca teeca incovaeguishetimatemppaji. Imaica inintacaajiaquenaquea naatimpajia nontsavetantero quenquetsatsarentsi vetsinrantatatsica.

²⁰ Irootaquequea imaica itigaranquimenquenaca Quirishito noncantajiaquempi inintacaajuempica. Manaquea nonquenquetsatacaaquiaquempi quempeca irioca cantanquitsica Aapani Irioshi. Intsishiatsi ininque Quirishito pivetsinrantajiajerija Aapani Irioshi.

²¹ Iriraquea Quirishito teequea incovaeguishetimatemppaji, cotanquitsiquea icatsimati menqueri Aapani Irioshi agovaeguisherejia, iquempetacaacari covaeguischeri cameetsaniji irimetojaventajiacajiniji aatimpajia. Ariquea iquempetaquero imaica Aapani Irioshi cameetsaniji aventaventaiquempariniji Quirishito iramenajiacajiniji Aapani Irioshi quempeca teeca ancovaeguishetimatemppaji.

6

¹ Naroguentijia amitacojiaquempica, irootaquequea noncantantajiaquempica imaica, shoshoh pitsaroventamampeajiatsijate intati, pipomatsajigurotsijate icavintsajacotaquem-pigueti Aapani Irioshi. ² Icanquetari:

“Oraquea aapojacagueti savincaguiteri ocameetsatantanacaca nonquemaquempi, noquemaquempiquea.

Aapojacagueti savincaguiteri naantavajimpica, ariquea nocavintsajitsitimpiquea.”⁵

Imaicaquea imaica jac aapojaca ocameetsatantanacaca inquemaquempiquea, imaicaquea aapojaca iraantavajempica.

³ Teequea nantajigueji taaca opajita intivashirentajitaquempaca aatonijite icantaguishetacojigana nontsavetantajaquegueti. ⁴ Maasanopae taaca opaji nantajigui manaquea nocomajamajacaqueate cameetsaniji nonigaajiaquempariniji maasano arimajaca naroguentijia inintacaajiaqueca Aapani Irioshi nontsavetantavaetaqueroquea Iguenquetsatsare. Manaquea natsiperejaguitaroni taaca opajitapae coraquetashijiaquenaca: yatsipetacaajitaquenaquea, oconoaca nocoguitejacovaejiaca, natsipevaecaquea. ⁵ Itavatavaavaejiaquenaquea catsimajiaquenaca, oconoacaquea manaquea isantanatacojitaquenaqueate. Ochoocaque manaquea itiavaejiapojana icatsimajiaquenagueti. Nantajiaque oshequi, otavaetanaquenaquea pochoquirents manaquea aisa aajiavetanaquenaqueate notase. ⁶ Cotanquitsiquea nococaniquea nocomajajaiaca, aisa notsamajajiaque iroomajatatsica. Natsipetacovaecari catsimajiaquenaca, aisa nocavintsajamajajiaqueriquea maasano, ichoocashirentajiaquenatari Ishire Aapani Irioshi yagavejacaajiaquenaqueate. Arimajaca

⁵ 6:2 Is. 49.8.

nopintsatantamajajiaca. ⁷ Nocantacoguitani taaca nocantajiaque arimajaca notampatica-majaqueroquea teequea namataajiguempaji. Aisa icocani yagavejacaajiaquenaqueate Aapani Irioshi. Oquejevetaca nashimirintajiaca, najiricaquero nogotsirote notincamijempequiqui aisa noguishorite najampatequi aatoniji taaca quempevaetacagana. ⁸ Oconoacaquea ishineventajitaquenaquea, oconoacaquea manaquea inintajitaque iroguiipashiventajitaquena. Oconoacaquea icantaguishetacojitaquenaquea, oconoacaquea itsavetacojitaquena cameetsa. Oconoacaqueate aisa manaquea icantashijitaquenaquea: “Iriguentijia amataatsica”, cotanquitsiquea nocantacoguitani notampaticamajataqueroquea teequea namatavijanteji. ⁹ Oconoacaquea ariqueate icantashijitaquenaquea: “Tee intsajiteriji”, cotanquitsiquea maasano notsavetantimojiaqueca itsamajajiaquena quero nocojigani. Nococani nopajiavecaroquea nometojane, cotanquitsiquea choocatatsitirajana nochoocajiaji. Itavatavaajivetaquena, cotanquitsiquea tee irimetojajitenaji. ¹⁰ Noshimampojancajiaveca, cotanquitsiquea nococani noshinevaeca. Teequea nashintajiatavetempaji, cotanquitsiquea quempeca iroguentica naajarantacaajiacari itsipapae icaramirincavaeque, irooriji nopaguenquejanequeri. Teequea taaca opaji nashintajiguempaji naatimpajia, cotanquitsiquea Aapani Irioshi icavintsajamajaquenaquea, jero quempetaca naroguentica ashintajigaroca maasano.

11 Corintojiaquitica, nocamanquempiquea maasanopae, teequea taaca opaji nontsititmateji, nopintsamajajiaquempi. **12** Teequea nomashitsatapitsatimojiguempiroji pintsata-gantsi nopintsajiaquempigueti, aviguentijia quejejianquitsi, tee pimpintsamajajianaquenaji naatimpajia. **13** Imaica noncantajiaquempi quempeca aviroca nirijanijiate. Nonintajiaque pimpintsamajajiaquenaquea, pinquempejiaque-naquea naatimpajia nopintsamajajiaquempi.

Aatimpajia aroguentijia itsovironaquite Aapani Irioshi

14 Quejetaca irira ashintarica caapironcaari aato itsipatacaantari tampishitatsica aisa teeca intampishiteji titonquirontsiqui ishiguitiqui, ari pinquejejiaquempa aato pitsipamajajigari caarica tsaroventari Aapani Irioshi, teequea ariquea pinquejetavacaajiguempaji. Iriraquea comajamajajiatsica ¿arimpate iragavejajiaque intsipatsipaitaquempari savicaventajiguiroca covaeguisherentsi inquemavacaajiaquempaquea? ¡Aatotarite yagavejitsi! ¿Arimpate agavejaque tsirencari onconoaquemparo pitsecari? **15** Quempeca Quirishito ¿arimpate iragavejaque inconoaquempari Veriari* inquemavacaajiaquempaquea? ¡Aatoquea yagavejitsi! Ariquea iquempetaca aisa tsaroventajiatsica ¿arimpate iragavejaque intsipatsipaitaquempari caarica tsaroventatsi

* **6:15** Veriari. Jero otsipa ivajiro imajirote ampatsinipae, icantajitiri aisa Satanashi. (Iguenquetsatsarequi quimajareri itioncagli-quero Belial ocaniqui.)

inquemavacaajiaquempaquea? ¡Aatotarite yagavejitsi! ¹⁶ Oraquea iteemporote Aapani Irioshi, ¿arimpate ocameetsataque inchoocatantajiguemparo ipeajitica irioshivijirentsi intati? ¡Aatotarite ocameetsati! Aatimpajia aroguentijia iteemporote Aapani Irioshi anijaguitatsica. [☆]
Icanque Aapani Irioshi:
“Nonchoocatimojiaqueri nontsipatsipaitaquempari;

iriatimpajia impeaqueñaquea Irioshite intsaroventajiaquempaca,
naatimpa nashintajiaquempaci.” [☆]

¹⁷ Irootaquequea icantantacaca aisa Amajirote Irioshi:

“Pintsinampirejajianajerija pisotoapitsapanajanteri,
pomporoguiashijianajempajate.

Aato pantajiguiro covaeguisherentsi.

Pinquempejiaquempagueti imaica naatimpa noshineventajavaquempi.” [☆]

¹⁸ “Ariqueate nompeaquempaquea Piri,
nompejaiaqueempiquea nirijanijiate aisa orijanjia.

Ariqueate icanque imaica Amajirote Agavejamatatsica.” [☆]

7

¹ Imaica, nopintsajiacaca, atsajiaquero ocatica icanqueca Aapani Irioshi irinetsanaqueca, iintsijate ampishoncamajajianaqueroquea maasanopae covaeguisherentsipae irooca

[☆] **6:16** 1 Co. 3.16; 6.19. [☆] **6:16** Irev. 26.12; Jer. 32.38; Esq. 37.27.

[☆] **6:17** Is. 52.11. [☆] **6:18** 2 Sam. 7.14; 1 Crn. 17.13.

aquenquejaguishejiaqueca irooca apeacaaguishejiacaca, maasanopae covaeguishetqueroneca atsino irooca ashire, manaquea antsaroacaajiaquemparija Aapani Irioshi ancomajamajajianaquempa, isaancashirencajitarite.

Paavoro ishineventajiacariquea Corintoquitica

² *jPishinetacaamajatenaja pimpintsama-
jajiaquenajate! Naatimpajia teequea
quericaca noncotimajigueriji, teequea querica
noncovaeguishetacaimatempaji, aisa teequea
querica namatavijimajigueji.* ³ *Teequea
irooqua nontionquimentajiguempiji noncan-
tajiaquempiquea pipeacaaguishejiacarogueti
covaeguisherentsi. Nocantajiaquempiquea
coramani nopintsamajajiaquempiquea oshequi.
Notsajiaque ancoquempani antsipatavacaaji-
aquempaquea choocatirajajajigueti irooca ame-
tojajianajegueti ancoquempaniquea antsipatava-
caajiaquempaquea.* ⁴ *Notsamajajiaquequea
piquemisantajiaquenaquea jero noshineven-
tantajiaquempica. Natsipevaevetacaqueate
cotanquitsiquea nocantacoguitani noshinevaeca,
aviguentijiaquea shinetaacaajiaquena.*

⁵ *Irooqua narejejiacaguetti Maseroniaqui
teequea nomagoremagorejiteji, ichoocajiaque
icaramirincajiaque catsimajiaquenaca teeca
intsaroventajiguempariji Quirishito. Aisa
noshoshoguitejiaca nocanca notsaroaneguin-
tavaetanaquequea.* ⁶ *Cotanquitsiquea Aapani
Irioshi ishinetacaantatarite ishimampo-
jancajitagueti, ishinetacaajiaquenaquea
namenajiavajirigueti icoraquetaji Tito.*

7 Teequea aparo noshinejiaquempaji namenajiajavajirigueti, manaquea aisa icamantajiapojana pishinetacaajiacari iriatimpa, aisa pinintajigui pamenajiajena, pishimampo-jancacovaejiacaroquea notioncajiaquempica coramani pishoshoguitetimentajiaqueroquea pinintajiaque pinetsanamajajiaqueroquea maasanopae nocantajiaquempica cameetsaniji pishinetacajaijenaniji. Iroompaquea irooquea noquemavaquitiguiquea noshinemajatanacaquea nocanca.

8 Coramani notioncajiaquempiquea noshimampojancacaajiaquempiquea, ariquea noquemacojiaquempigueti noshimam-pojanquitsitanacaqueate naatimpa aisa. Cotanquitsiquea teequea oncantacoguitempani noshimampojancaguitempani, ariqueate piquempejiaca aviatimpajia teequea pincantacoguitempani pishimampojancaguitempani.

9 Imaica shinevaetajana. Teequea irooquea noshineventempaji pishimampojancajicaguetai, iroguenti noshinevenca namenaquequea pishimampojancavaetanacaguetai pamenajia-quegueti pipeacaagushejiacaro covaeguisher-entsipae, iroompaquea picantashitatijaianaja. Oraqueate piquempejiacaguetai imaica picantashitatijaianacaguetai manaquea pishine-tacaajiacari Aapani Irioshi. Irootaquequea noshinevaetantanacaca namenaquequea teequea ariquea novashiantacaajiguempiroji pitsaroventajiacariguetai. **10** Oraquea shimampojancarentsi inintica Aapani Irioshi irooquea ashimampojancacotaquemparogueti

aguempevaere avashiantanajero cameetsaniji
 irishetacojiacajinijite iraajiavajaji aatoniji
 apejaiga. Oraticaquea shimampojancarentsi
 aato aquenquejacotiro: “Aatomesano
 noshimampojancame.” Cotanquitsiquea irishi-
 mampojancashitanaquempagueti intati irirajia
 teeca intsaroventempariji Aapani Irioshi, mana
 irimetojashirentanaque. ¹¹ Aviatimpajia arimaja
 ishimampojancacaajiguimpi Aapani Irioshi
 yamenajiaquempigueti pipeacaagushevae-
 caroqua covaeguisherentsipae, iroompaquea
 pinintamajajiaque pintsaroventajianaquempari
 pincomajamajajianaquempa, osemajen-
 catacaajianaquempi pamenaquerogueti
 ipeacaagushejicaca, aisa pitsaroajianaque.
 Iroompaquea pinintamajajiaquequea noanaque
 nontsipatsipaitaquempi, cotanquitsiquea
 iroquetitaquea pinintamajatanaquequea
 pintampaticamajajiaqueroquea nocantaji-
 aquempica. Imaicaquea imaica pinetsanama-
 jatanaqueroquea maasanopae, tee anejeroji
 querocampate incatsimatimentajiaquempica
 Aapani Irioshi, jac comajamajajiaquem-
 piquea. ¹² Oraqueate notioncajiaquempica
 teequea aparo nonquenquejajigueriji irira
 peacaagushetanquitsica covaeguisherentsipae,
 iriguentic aisa ishimampojancacaacaca.
 Aviguenti noquenquejajiaque aisa noninquequea
 pintsamajajiaque yamenaqueempitari Aapani

Irioshi arimajacaca pipintsamajajiaquenaquea.*

¹³ Imaica noquemacojiaquempiquea piquempejiaquerogueti imaica pishineventajiaquena, irooqua shinetaacaajiaquenaquea, cotanquitsiquea caaviji noshinevaetanaca namenajiajavajirigueti Tito cameetsa icorajetaji ishinevaetapoja, aviguentijiaquea shinetaacaajiacari, paajiaavaqueri cameetsa pinetsanajiaavaqueriquea. ¹⁴ Oraquea tequeratagueti nontigaranqueriji Tito oraniqui aviatimpajiaqui nocanqueri: “Noshineventajiacari tsaroventajatsica Corintoquiaquitica, notsaque cameetsa iraajiavajempiquea.” Ariquea imaica yamenajiaquempigueti itsaque arimajaca nocamanquerica teequea namatavijeriji, manaquea noquempejiaquempi aviatimpajia teequea namatavitempiji. ¹⁵ Imaicaquea imaica iriatimpa caaviji ipintsajiaquempi, yamenaquea piquemisantamajajiaqueriquea taaca opaji icantajiaquempica, aisa paajiaavaqueri cameetsa, pishineventajiacaracari. ¹⁶ Naatimpa aisa noshineventajiaquempi oshequi notsaque pintajiaque pincoquempani pisavicaventajiaquero inintaguetica Aapani Irioshi.

8

Icavintsajantajiaque Maseroniaquitica

* **7:12** Ochoocataquetari otsipa paperi iguenquetsatsarequi guiriego ocanti ocaniqui: “pintsamajajiaque yamenaqueunatari Aapani Irioshi arimajacaca nopintsamajajiaquempi.”

¹ Imaica, napitsaroventarijate, noninque noncamanquempiquea quero icocani Aapani Irioshi icavintsajajiaquerigueti tsaroventajiatsica capiocaguetanquitsica gunteninintsipaequi Maseroniaqui, jero ariquea iquempejiaca iriatimpajia ipintsatantajiaca. ² Yatsipejiavecaquea iquemisantajiaquegueti, cotanquitsiquea ishinejiaca icanca. Teequea irashintajiavetempajia cotanquitsiquea icavintsajantajiaque quempeca iroguentica yashintajiaaca. ³ Namenaquequea naatimpa manaquea yaagarantajiaquequea imentaquitsitepae itigarancacaantajiaqueneri irapitsaroventarijate coguitejacovaetanquitsica. Teequea irioqueate iraagarantajigueji choocagarantajatsica ichoocataji teeca incoguitejacotempariji, yaagarantajiaque aisa icoguitejacovetacaca iriatimpajia. ⁴ Iroompaquea inchiquiojita icantacantajiaquenaquea inintajiaquegueti inquejejianaquempaquea iriatimpajia incavintsajajiaqueri irapitsaroventarijate guntenijiatsica Jerosarequi. ⁵ Cotanquitsiquea teequea aparo irinintajigue incavintsajajigueriji irojocagarantajiaqueneri imentaqui, manaquea inintamajajiaque irantajiaque taaca opaji ininque Aapani Irioshi, aisa inintamajajiaque iramitacojiaquenaquea naatimpajia aisa, irootaquequea ininque Aapani Irioshi. Yanaitsipojanaroquea noquenquejajiavetacaca. ⁶ Jero noquenquetsatacancarica Tito iroanaquequeate oraniqui iramijajatempi paagarantajiaje itsipa pimentaquitsitepae pintigarancajajenerija papitsaroventarijate pinetsanajajerojate pipariajiavetanacaca

coramani icantajiaquitimpica yoaquitigueti yamenajiaquitimpigueti. ⁷ Aviatimpajia caaviji picojiaca, caaviji pitsamajajiaque inetsanamajaqueroquea Aapani Irioshi maasanopae icantaguetica. Pitsamajajigui pitsavetantajiaquerogueti Iguenquetsatsare Aapani Irioshi, aisa pitsamajajiaqueroquea queroca ocanque. Pishineventamajacaroquea pantavaequenerigueti Amajirote, manaquea aisa pipintsamajajiaquenaquea. Imaica noninque aisa pinetsanamajaquero ocatica pincavintsajantegueti pojocashiguetacanarigueti itsipapae.*

⁸ Cotanquitsiquea teequea noncantajiguempiji: "Iintsijate pinetsanamajajiaqueroja." Manaquea noninque nonquenquejacaajiaquempiroquea quero icojiacani icavintsajantajiaquegueti itsipa papitsaroventarijate pinquejetantajianaquemparica aviatimpajia, irootarite intsamajatantajitanaquemparoca arimajaca pipintsatantajianaca. ⁹ Pitsajiaquequea icavintsajamajaquempiquea Amajirote Jesoquirishito. Yashintamajavetacaroquea iriatimpa maasano coramani, cotanquitsiquea yojocapanajantiro iquempetacotapojacari teeca irashintimatempaji cameetsaniji incavintsajajiaquempiniji aviatimpajia, inquempetacajajiaquempiniji ashintavaejiatsica.

¹⁰ Imaica namenaque cameetsa pinetsana-

* **8:7** Pamenero 1 Co. 16.3. Icantajiaque Corintoquitica intatjiaque impintsatacojiaquempari irapitsaroventarijate Jerosarequitica iraagarantajiaqueneri imentaquitsitepae intigarancijaqueneri.

jiaqueroquea pipariajianacaca coramani cameetsaniji pishinejiaquempaniji, aviguentijiaquea nintajianquitsica iroaqueragueti paagarantajiajeneri pimentaquito, iroompapea ariquea pipariajianacaroquea. ¹¹ Imaica pincoquempanija paagarantajiaquenerija pinetsanajiaqueroquea pipariajianacaca aviatimpajia iroaqueragueti, pishineventajiacarotari. Inchiquiojijate pinquenquejajiaqueroquea aviatimpajia querocaca pagavejajiaque paagarantajiaque. ¹² Arimajacagueti netsana pinintamajajiaque pojocantajiaquequea, irishineventajiaquempiquea Aapani Irioshi querocaca pojocantajiaque. Iriraquea ashintamajatanquitsica irojocantaquequea oshequi. Iriraquea teemajaca irashintempaji capichajaniqui irojocantaque, teequea incanteji Aapani Irioshi pojocantajiaquequea teeca pashintempaji.

¹³ Teequea ariquea noncantajiguempiji pincavintsajajiaquerijate itsipapae papitsaroventarijiate cameetsaniji onchoocaquenijite icoguitejacojiacaca iriatimpajia ariquea aviatimpajiaquea atsipejianquitsineca pincoquitejacovaeguitempani. ¹⁴ Iroguenti noninque pinquempetavacaajiaquempaquea. Imaicaquea imaica aviatimpajia pashintajiaca jero picavintsajantajiacarica papitsaroventarijiate, cotanquitsiquea iroompaquea ariqueate avirogueti coguitejacojianquitsineca irioqueate cavintsajajajempineca. Pinquempejiaquempagueti imaica ariquea iroguenti manaquea pinquejetavacajajaqueempa. ¹⁵ Otioncacatarite:

“Iriraquea aamajatanquitsica teequea onchoocatajeji choocatajatsica. Ariquea iquempetaca aanchuitsica capichajani qui teequea interoncacotempaji.”¹⁵

Iroajate Tito iramenajiajateri

¹⁶ Noshinevencari Aapani Irioshi name-naqueuea iquenquejacaqueriquea Tito iquenquejacojiaquempi iquempetaquenaquea naatimpa noquenquejacojiaquempigueti. ¹⁷ Jero ishinevaetantacaca nocanquerigueti nonintaveca iroajateja iramenajiaquempi, irootaquequea inintamajaque iriatimpa. ¹⁸ Nontigarancajiaqueri aisa itsipa papitaroventarite intsipatanaquempaca. Ishineventamajajiacari maasano tsaroventajiatsica capiocapinijiatsica, icamantacojiaqueriquea yamenajiaqueriquea caaviji itampishiventamajaquero Quenquetsatsarentsi Oganejencatatsica. ¹⁹ Cotanquitsiquea teequea aparo onchoocateji ocatica, inintacaajiaqueriquea aisa nontsipatanajempari oncoramanitapoja-jegueti naajianaquenerigueti imentaquipae pojocashijiaquenemparica coguitejacojian-quitsica. Arikea nonquempejiaquempaquea imaica cameetsaniji iramenajitaqueriniji Amajirote caaviji icavintsajantavaeti arikea irishineventajitaquempari, aisa cameetsaniji iramenajitaqueroja arimajaca nonintajiaque naatimpajia noncavintsajajiaqueriquea apitsaroventarijiate. ²⁰ Noshinevaeca

¹⁵ **8:15** Eeq. 16.18.

intsipatsipaitanaquenaquea aatoniji ican-taguishetacotimentanaritsi imentaqui iriraquea agarantajiaquerica. ²¹ Teequea aparo nonintajiguejì iramenajiaquenaqueate Amajirote nocomajamajaca, iroguentiquea nonintajiaque intsamajajiaque caquinteja aisa.

²² Imaica nontigarancaqueri aisa itsipa apitsaroventarite intsipatsipaitanaquempari, namenamajajiaqueriquea iriguenti caavijica itsaroventamajatari Aapani Irioshi. Aisa nocamantaqueri caaviji pinintajiaque pincavintsajajiaqueri papitsaroventarijate, irootaquequea inintantacaca iroaquite oraniqui iramenajiaquitempi. ²³ Iricatica Tito, iriguenti notsipamajare nantinirigueti Quirishito noconoajiaquempigueti. Irirajia apitsaroventarijate intsipatsipaitanaquempaca iriguenti itigarancajiaqueca tsaroventajatiacsica capiocapinijiatsica guinteninintsipaequi. Iriatimpajia caaviji itsaroventamajatariquea Quirishito. ²⁴ Irootaquequea noncantajiaquempica imaica netsanaja paamajajiavaqueri cameetsaniji intsajiaqueniji maasano tsaroventajatiacsica capiocapinijiatsica arimaja notampaticamajaqueroquea nocantajiaquerigueti caaviji pipintsamajatantaca.

9

*Inciapiocajiaqueri imentaquitsite intigaranca-
caantajiaqueneri irapitsaroventarijiate*

¹ Nocantajiaivequempi imaica cotanquitsiquea notsaque teequea pincoguimentacojiguemparoji

nontioncajiaquempiquea noncantajiaquempi
paagarantajiaquenerijate pimentaqui sitepae
papitsaroventarijate. ² Notsamajaque caaviji
picavintsa jantajiaque. Nocantantajiacarica apit-
saroventarijate Maseroniaquitica pinintamajaji-
aque quea aviatimpajia guitenijiatsica Acayaqui
paagarantajiaqueneriquea pimentaqui sitepae
Jerosarequitica, pipariavaetanacaroquea
otsipaniqui ajagantsiniqui. Oraqueate
iquemajiaquegueti iriatimpajia ariqueate
inintagarantajiaque inquempejiaquempiquea
aviatimpajia iraagarantajiaqueneriquea
iriatimpajia aisa. ³ Irootaquequea imaica non-
tigarancantajiaquemparica apitsaroventarijate
iramijiaquempiquea paagarantajiaquerigueti
aatoniji manaquea intati noncamanqueri
Maseroniaquitica pinetsanajiaqueroquea
maasanopae. ⁴ Noncoraquetarite
namenajiaquempiquea aricaquea nontsi-
pagarantajiaquempari Maseroniaquitica.
Oraqueate noncora quecora queivequempagueti
arigueti namenajapo jempiquea teequea pinet-
sanamajajigeroji nocantajiaquerica, manaquea
ovashiventajavaetanaquenaquea, ariqueate
pinquempejiaquempaquea aviatimpajia ovashiv-
entajavaetanaquempiquea. Iroompaquea
noncanque: “Arimpate nocanque irinetsana-
jiquerojate maasanopae.” ⁵ Irootaquequea
namenantacaca aricaquea cameetsaca
nontigarancajiaqueri iriatimpajia apitsaroven-
tarijate iriquetitaquea oahoaitanquitsineca
iramenajiaquempiquea iramijiaquitemp
paagarantajiaquerigueti pimentaqui sitepae

pinetsanamajajiaqueroquea picantajiaqueca
 coramani. Pinquempejiaquempagueti imaica
 intsajiqueroquea inchiquiojita aviatimpajia
 pinintajiaque pincavintsajantajiaquequea,
 teequea naatimpajia cantajiguempironeca.

⁶ Iintsija pinquenquejajiguerojate ocatica:
 Quericaca vintyacatsica capichajaniqui,
 capichajaniqui iraaje.

Iriraquea vintyacamajatatsica,
 oncarapiovaetanaquequea iraaje.

⁷ Inchiquiojiquea pamena jiaquempa aviatim-
 pajia querocaca incarajigueni pimenta quitsite
 pinintajiaque pojocagarantashitantempa,
 iroo quea pojocantajigue; cotanquitsiquea aatoja
 picatsimajencatacójiguiritsijate pojocantajiaque-
 gueti. Aisa aatoja iroo quea pojocantantajiga
 pamena jiaquegueti incantajitaquempi:
 “Pojocantetsija.” Iriraquea Aapani Irioshi
 iriguenti ishinevenca shinevencaroca irojocan-
 tavaetaquequeate. ⁸ Yagavejaquequea Aapani
 Irioshi incavintsajamajajiaquempi cameetsaniji
 pagavejajiaqueniji pincantacoguitempani
 pincavintsajantajiaque aviatimpajia aisa.
 Irio quea oshequiajempirone pincoguiteja-
 cojiaquempaca onchoocatantaquempaca
 otsipa cameetsaniji pojocagarantajiaqueneri
 coguitejacovaetanquitsica. ⁹ Otioncacatari:
 “Ipintsatacotacari coguitejacovaetanquitsica yo-
 jocaguetaqueneri;
 itampaticamajataquero yo aquero, ari quea incan-
 tacoguitempani.”

¹⁰ Iriraquea Aapani Irioshi iriota quequea
 jocagueneri vintyacatsica oitsoqui aisa

ishecaguetacaca, ariquea inquempetacaquem-piroquea aviatimpajia aisa, iroshequiaqueroquea pashi pincavintsajacomajatantanaquemparica itsipajia. ¹¹ Arimajaca iramitacoguetaquem-piquea Aapani Irioshi onchoocamajaqueniji cantashitatiaguetsica cameetsaniji pagave-jajaqueniji pincoguitempani pincavintsajan-tajiaque. Oraqueate arejetapojaquempaguetti naajianajenerigueti paagarantajiaquenerica papitsaroventarijiate irishineventamajajitaque-mpariquea Aapani Irioshi incantajiaque caaviji ipintsamajatantaca. ¹² Aritarite pojocantajia-canarica, teequea mana pojocajigueneri intati icoguitejacojiacaca igomajamajarejia Aapani Irioshi, irooquea onquenantanaquempaca aisa incantantajiaquemparica: “Arioteesa, Aapani.” ¹³ Ariqueate iramenajiaquegueti pintigarancacaantajiaqueneri pimentaqui site intsaquiaque teequea pimashitsajiguempaji manaquea pipintsajiacariea iriatimpajia aisa maasano tsaroventajatsica, ariquea irishineventajiaquempariquea Aapani Irioshi iramenajiaquetari tee pincantashijiguempaji intati: “Noquemisantaquero Quenquetsat-sarentsi Oganejencatatsica tsavetantaquerica Quirishito”, iroguentiquea iramenajiaque arimaja pitsaroventamajajiacari Quirishito pinetsanamajaqueroquea icanqueca. ¹⁴ Ariqueate iramanacoventajiaquempi quea impintsamajajiaquempi iramenajiaquem-pigueti picavintsajajiaqueri, iriguentitari chagashirentajiaquempi quea Aapani Irioshi piquempetantajiacaroca imaica. ¹⁵ ¡Jaameshiatsi

ashineventajianaquemparija Aapani Irioshi, ancantajiaqueri: “Arioteesa”, caavijitari ipintsamajatantaca!

10

Icanque Paavoro iriguenti tigarancaqueri Quirishito

¹ Imaica naatimpa Paavoro noncantajiaquempigueti nonintacotaquempica, noninquequea nonquejetaquempari Quirishito yatsipetacovae-tagueti icavintsajantigueti. Icantacojivetaquena notsaroanaque nochoocatimojiaquempigueti, cotanquitsi nochoocaquegueti osamani notampishivetaca.

² Nonintaquequea nonchoocatimojiaquempigueti aato noshiram-paritimojiguimpi noncantomajajiaquempiniji, irirampani jivetanquitsica noguijatacotiro iquenquejaguetic acaquinte, arica irioquea noncantomajajiapojaque.

³ Arimajasacanica naroguentijia caquinte, cotanquitsiquea teequea nonquempejiguempariji itsipajia caquinte nashimirintempagueti. ⁴ Nashimirintamentopae teequea onquejetemparoji yaventajiacaca teeca intsaroventempariji Aapani Irioshi, iroguentiquea navenca itampishica Aapani Irioshi, nagavejantacarica tampishijiavetatsica.

⁵ Nagavejajiaqueriquea maasano teeca irishineventemparoji Iguenquetsatsare Aapani Irioshi manaquea itampishitashijiavetavacaroquea. Jero yagavejacaantajiaquenaca cameetsanijite nomajeretacaajiaqueriniji maasano ticaticaaquerineca itsipajia aatoniji

itsajiguiri Aapani Irioshi. Iquenquejaguetaqueca caquinte oquejevecariequa ashimirintavecajica aajiaqueca. Yagavejacaajiaquenaquea aisa Aapani Irioshi nagavejajiaqueriquea quenquejaguishejiatsica covaeguisherentsi cameetsaniji aatoniji iquenquejaguishevaetajitsi irioquea inquemisantamajajianaque Quirishito.
⁶ Iroquetitaquea noninque pinquemisantamajajianaqueriquea, iroompaquea noncantimentsi jiguempariquea irirajia maasano pigatsatacarica.

⁷ Aviatimpajia pijijiaqueji pitsajiaque, cotanquitsi tee pamenamajajigueroji. Cotanquitsiquea choocagueti amenanquitsineca iriguenti tigarancaqueri Quirishito, iiintsijate intsaque iriatimpa itigaranquitsijianaquea naatimpajia aisa. ⁸ Choocagueti quenquejashitanquitsica: "Mana isemetaque", nocantajiaquempigueti iriguenti tigarancajiaquenaquea Amajirote, cotanquitsiquea teequea ovashiventajenaji nocanqueca, arimajacatari iriguenti tigarancajiaquenaquea yagavejacaajiaquenaqueate nontsatacajajiaquempi arimpaqueate pintsaroven-tamajajianaquempari pintsipatavacaamajajianaquempa, aatoquea nopeacotacajaiguimpiro pitsaroven-tajiacarigueti pincamanajante pintsinampirejavacaajianaquempaquea.

⁹ Teequea noninteji onquempetimojiguempi notioncajiaquempi nomintsaroajiaquempiniji.

¹⁰ Iconoagarantajiacatari icantajiaque: "Oraquea itioncajianaqueca Paavoro ooqueate itampishijaniquipue icatsimajiaquenaquea, cotanquitsiquea oraquea ichoocagueti quempeji itsaroaque teequea intampishiteji, aisa

teequea intsاتimateji inquenquetsateji.”
 11 Cotanquitsiquea imaica noncantajiaqueriquea irirajia cantajianquitsica imaica, noncoraquequegueti oraniqui aviatimpajiaqui, ariqueate nonquempetacaajiaquemparo notioncajiaquempica nontampishimajaquequea noncanquempa.

12 Naatimpajia aatoja noquempejigaritsi irirajia aventajiatsica cantajiatsica: “Notsajiaque nocanca”, inchiquiojitaja icantajiaja iriatimpa. Iriatimpajia yamenavacaavetaca ijiqueji irioji cameetsari, cotanquitsiquea teequea intsاتimateji taaca opaji cameetsatatsica, aisa taaca opaji covaequishetatsica. 13 Naatimpajia teequea nonintajigueji nosemejigue nonquempejiaquemparimequea iriatimpajia. Oraqueate nocantacojiaquerogueti nantajiaquenerica Amajirote, teequea nonquenacaashitemparoji, manaquea tampatica noajiaquero, iriguenti cantanquitsi Aapani Irioshi iroaqueragueti querocagueti oraniqui nonchoocajiaque nontsavetantajiaquerogueti Iguenquetsatsare, jero arejetantajiacaroca oraniqui aviatimpajiaqui. 14 Oraquea aatomegueti notsavetantimojiguimpimequea, ariquea iriguenti manamequea noncanqueme intati naatimpajia tsarovencaajiaquempi, cotanquitsiquea teequea ariquea nonquempetempajimaica, naroquetitarite itigarancaqueca Amajirote nontsavetantimojiaquittempiroquea Quenquetsatsarentsi Oganejencatatsica tsavetantirica Quirishito. 15 Teequea ariquea naitsivacotantimateji noncantajiaque

naroguentijia tsaroventacaajiacari itsavetantimojiaqueca itsipa. Imaica manaquea nonintamajajiaque pintsaroventamajajianaquempari cameetsaniji nontsatacayaquempiniji otsipa nontampishitacaajiaquempiniji arimpaquea pintsaroventamajajianaquempari.

16 Iroompaquea namenajiaquempigueti pinquempejiaquempaquea imaica, ariquea noanoaitaque osamanipaequi tijacoñajisano ontaniqui ichoocajiaquegueti tequerataca intsavetantimojiteriji noncamantaqueriquea iriatimpajia aisa Quenquetsatsarentsi Oganejen-catatsica. Manaquea nonquempejiaquempaquea imaica aatoniji nopinajavacovaetantatsi. **17** Irira shineventacotatsica, iriguenti irishineventacotimentempa Amajirote.◊ **18** Aatoquea irio ishineventajita irira cantacotatsica: “Caaviji nonetsanamajatiro.” Iriguentequea irishineventajitempa incantacotaqueca Amajirote: “Caaviji inetsanamajatiro.”

11

Paavoro aisa irirajia tsavetantamampeajatsica

1 Teequeate nonintavetempaji nonquempetaquempariea aventacovaetatsica intati, cotanquitsiquea pantsipetacovaejiaquenaquea nonquempetaquempagueti imaica. **2** Oshequi nagamajacotaquempi, irira Aapani Irioshi quejetacaquenaro, namenaqueroquea naroguenti tsaroventacaajiaquempica jero nonintantacaca apaniro poamajaqueri

◊ **10:17** Jer. 9.24.

Quirishito cameetsaniji oncoramanitapoja jegueti incoraqueta jategueti iramenajiapoja jempiniji comajamajajiaquempiquea quempejiaque-mpiqueate majinaro comajamajatatsica, aparo oguijaqueri manquigataquemparoneca.

³ Pinquenquejerija coramani iriraquea camaarini* manaquea yamatavijaquero Evani icovaeguishevaetacaacaroquea, irootaquequea notsaroantacaca imaica namenaque choocaguetai irirajia amataajati tsica inquempetacaajiaquempiquea aviatimpajia aisa, iroompaquea pinquenashijianajempa aatoquea quisho poajiajiritsi Quirishito, aatoquea pitsaroventajiajari.

⁴ Namenajiaquempitari iriguenti pishineventamajajica iriatimpajia. Oraqueate itsavetantajia vecariguetai Jesoshi teequea intampaticateroji iroajigueroji, quempetaca iriguentica itsipa itsavetantajia que. Ariquea oquempetaca aisa manaquea pinintajiaquequea irishaquiajia pojempiquea itsipa teeca irioquea Ishire Aapani Irioshi choocashirentajia vecarigueroji iroqueragueti. Aisa piquemisantamajajia guitirini tsavetantajia vecaroca otsipa oganejencavetatsica teeca onquempetemparoji Quenquetsatsarentsi Oganejencatatsica notsavetantimojiaquempica piquemisantajia vaqueca iroqueragueti.

⁵ Cotanquitsiquea namenaque teequea iranaajiguenuaji irirajia tsavetantajia tsica amenajati tsica iriguentijia itigarancanemajaca

* **11:3** camaarini. Pamenero Jen. 3.1-7. Iriraquea Satanashi yonigaacaroquea Evani, iquejetapojacari camaarini.

Jesoshi. ⁶ Arica tee nonquenquetsavetempaji cameetsa notsavetantigueti, cotanquitsiquea oraquea notsaquea cameetsavaeque onaque. Irootaquequea pamenantajiavaquenaca notsatacaaajiaquempigueti, noguiconejama-jataquempiro.

⁷ ¿Arimpate pinejaquero tee oncameetsateji teegueti novegaratacayaiguempiroji notsavetantaquempiroguei Quenquetsatsarentsi Oganejen-catatsica itigarancaquea Aapani Irioshi? ¿Arimpa pinejaquero iroguenti coguisherentsi teegueti nanaajencajiajapojaquempi, aviguentiquea nanaajencatacaajiajopojaque? ⁸ Aisa manaquea quempeca iroguentica naapitsajiaqueriquea imentaquitsitepae tsaroventajiatsica osamanipaequitica, yojocajiaquenatarite cameetsaniji onchoocaqueniji nocoguitejacocaca nagavejaquenijite nontsavetantimojiaquempiniji aviatimpajia intati. ⁹ Quempeca nocoguitejacovaecaguetti teequea ariquea nasereseretempiji namanajiaquempiquea. Oraqueate icoraquecoraqueiqueguei apitsaroventarijiate Maseroniaquitica ariquea yojocajiaquenaquea. Arikeate noquempetaqueroquea coramani teequea nonintej i nasereserejiaquempi, imaica nococani noquempetaqueroquea imaica. ¹⁰ Notsamajaquequea iriguenti nintacaaque-naquea Quirishito nontsavetacoqueriquea, ariquea oquempetaca aisa notsamajaque teequea namataguempaji. Irootaquequea noncantantajiaquempica imaica naatimpa aatoja yojoquimajiganatsi imentaqui guntenijiatsica Acayaqui, aatonica nonintitsi, iroguentiquea

noninque nontsavetantimojiaquempiquea intati.
11 ¿Queroquea ococani noquempetantacaroaca imaina? ¿Arite teete nompintsamajajiguempiji? ¡Iriraquea Aapani Irioshi itsamajaque arimajaca noppintsamajajaguempiquea! **12** Cotanquitsiquea arimpaquea nonquempetanaqueroqueate imaina aatonica nonintsijiguimpirltsi pimentaquisite cameetsaniji aatoniji yagavejajiguitsi semejiatsica tsavetantamampeajiatsica intati incantajaque: “Manaquea noquempejiacari Paavoro notsavetantajaquegueti.” **13** Iriguentijia amatavijantajatsica, teequea irioquea tigaranquerine Aapani Irioshi, manaquea ipeamampeajiaca intati itigarancanejia Quirishito. **14** Iriatimpajaquea caaviji iquempejiaca imaina, quempeca Satanashi ariqueate iquempetamampejaariquea irashivantite Aapani Irioshi iramatavijanquenijite. **15** Ariqueate iquempetacaquea iriatimpa imaina, jero irirajia antajiguimirica ariquea inquempejiaquempa iriatimpajia aisa impeamampeajiaquempaquea tsatacaantantajiguiroca comajatagantsi, cotanquitsiquea incatsimamajajitaqueriquea oncoramanitapoajegueti, yamatavimatavitanta-vaequetari.

Paavoro yatsipeventavaeta caroqua itsavetantavaeta quegueti

16 Noncantsijajempiquea aisa aatoja pijijiguitsijate ariji noppigataca intati, pantsipetacovaequenaquea nonquempetaquempagueti imaina cameetsaniji naventacovequitempanijite capichajaniqui.

17 Oraquea nocanqueca imaica teequea irioquea cantenane Amajirote inchiquiojitaquea nocanque naatimpa naventacoquempagueti quempequenaquea naroguentica shoncacori.

18 Quempetaca irirajia catsimajiaquenaca icantaguishetacovaequenagueti icantacoguitani yaventacojiaca, irootaquequea namenantacaca aricajate nonquempetaquempajate naatimpa naventacotempajate. **19** Aviguentijia tsajiale-tatsica, patsipetacotantavaevecarica irirajia shoncacorijia, aisa pishineventajiacari. **20** Aisa patsipetacojiaca yomperaperaivaequempigueti quempeca irioca ashintajiguimpi, aisa yamanamanavaequempiquea cantashitati-aguetanquitsica taaca opaji inintajiaqueca, manaquea aisa yanaajencavaetaquequea, ariquea aisa yapatoncavorotsijiguimpi.

21 Aricaquea pinintajiaveca aviatimpajia nonquempajiaquemparimequeate iriatimpajia, cotanquitsiquea teequea nagavejeji, teequea ariquea nonquempajiguempariji iriatimpajia itampishijiguigueti.

Manaquea noncantajiaquempiquea aisa taaca opaji yaventacojiaca iriatimpajia, ariqueate nonquempetaquempa naatimpa naventacovaequempajate (iroguenti noquenquetsaque quempeca naroguentica shoncacori). **22** Iroogueti yaventacojiaca icantajiaque iriguenti evereojoia, ariqueate noquempetaca naatimpa aisa naroguenti evereo. Iroogueti icantajiaque iriguenti ishiraerijia, ariqueate noquempetaca naatimpa aisa naroguenti ishiraeri. Iroogueti icantajiaque

iriguenti ichoviquijianaqueca Averaameni, naatimpa naroguenti aisa ichoviquini. ²³ Arica icantajiaque iriguenti yantajiaquene Quirishito, ariqueate noquempetaca naatimpa aisa iriotaquequea nantaquene, cotanquitsiquea caaviji nanajaiqueri iriatimpajia. Manaquea noquempetacari shoncacotatsica noquen-quetasquegueti, cotanquitsiquea caaviji nanajaiqueri nantiniri Amajirote. Aisa caaviji nanaaque naatimpa itavatavaavaetanaquequea, aisa isantanatacojitanaquenaqueate. Aisa caaviji nanaaque natsipevaeguitaniqueate irooshivetapojaca irimetojajitenamequea.

²⁴ Ipasapasavaetaquenaquea nogonorojia joriojia agompiquitana ocaravaeque 39. Yaitsitajanaquea aisa yarejetacaavaetanaro 5.

²⁵ Ariquea oquempetaca aisa itavatavaajitaque- naquea inchaquijiqui, yarejetacaavaequerenaro 3. Itsipajia itsinatsinavaejiaquena. Ocarataque 3 notsitijaatacovetanaca quenajarontsiqui noquenajatantavetanacaca. Aisa notsitijaat- acotanaquegueti ontaniqui niganquijaqui inirojani quentijani teequea noncatimatajempaji nagatsitajempaji, manaquea nopitsecacotanaque apajencaro aisa nocantacoguitani namajaguitini apajencaro savincaguiteri. ²⁶ Oshequi

noquenaguetanaque. Ochoocaguetaque covejencaguetatsica: chooca covejencatatsica ojaquiniqui, chooca aisa aitsitantaguetatsica senacashitaquenaca. Iriraquea nogonorojia iquejetsijianacaquea iriatimpajia aisa, irooshivetapojaca irimetojaquename. Ariquea iquempejiaca itsipapae caquintejia teeca irioquea

nogonorojia. Choocaquea covejencatatsica nochoocaquegueti gunteninintsipaequi, aisa noanaquegueti teegueti inchoocamajateji caquinte, chooca aisa noquenajatanaquegueti inirojaniqui quentijaniqui. Aisa ariquea iquempejiaca cantajiavetanquitsica iriguenti tsaroventajatsica inintajiaveca irimetojajaque-name. ²⁷ Natsipevaeca nocanca nantaquegueti, natsipevetacaroqueate taaca opajitapae. Otiavaetanaquenaqueate novochoquire, aisa otiavaetanaquenashiatsi notase aisa nomire. Oconoacaquea nosavicashitacaqueate intati teequea noshecatimajaniquitempaji. Natsipevaecaro catsincaguiteri, aisa nocajaratsi-novaetanaque.

²⁸ Teequea aparo nantsipetemparoji ocaticapae, manaquea oavaetanaque savincaguiqueriqui noquenquejacojiaqueriquea aisa maasano tsaroventaripae noshoshoguitementajiacari. ²⁹ Quericaca noquemacoqueca teeca intampishiteji irooca yojoquijitaca oquejetimotaquenaquea naroguentime joquijitanquitsi. Quericaca noquemacoqueca icovaeguishetacajaicari manaquea ocatsishirentavaetanaquena.

³⁰ Oraquea naventacoquempamegueti iroomecaquea naventacoquempame name-naquequea teequea nagavejeji. ³¹ Iriraquea Aapani Irioshi Iriri Amajirote Jesoquirishito itsaque teequea namatavijanteji. Iriatimpa caaviji yoganejencamajataca ancoquempanija ashineventajaquemparija. ³² Oraqueate coramani nochoocaguetsi Tamashicoqui

iriraquea iramajirore majirontatsica
 Aretashi itigaranquitsijiavecari igoaretajiate
 isenacashijijaquenaquea sotomorontsiqui
 yanquitsaegotatantarogueti mapi ocapiocagueti
 tsovironaqipae iraajiavaquenamequeate irisan-
 tanatacojiaquenamequea. ³³ Cotanquitsiquea
 iriraquea napitsaroventarijate itetsijianaqueate
 cantiriqui yoguisotoacotsitana ishagaraquire-
 jajiquerogueti yoguivarintsajacojiaquenaquea
 yovanquirejacojiaquena antaqueronta
 noshiapitsatapanajantari.

12

Paavoro itsavetantajiro yonigaimojiquerica

¹ Teequea nonintavetempají nosemetaque
 namenaquequeate nosemevequempagueti
 ariquea queroca noncoqueroni, cotanquitsiquea
 imaida irooqueate nontsavetacotaque yamena-
 jiguetaqueca quejevecaroca yoguimaacagueti
 aisa yonigaantaqueca Amajirote. ² Notsataqueri
 irira shirampari yashintacaca Quirishito,
 ocoramanivaetapojaquegueti ocarataque ¹⁴
 ajagantsini imaida, yatsomajajitaquitiri inquite-
 qui jenoquimajatanquitsica, cotanquitsiquea
 teequea nontsateji aricaca yatsomajajitanaqueri
 maasanotsino irooca yaashirentajitanaque-
 riqueate, aparo itsaquieroqua Aapani Irioshi.
³ Noncantsijajempiquea aisa, teequea nontsateji
 aricaca yatsomajajitanaqueri maasanotsino
 manaca yaashirentajitanaqueriquea, aparo
 itsaquequea Aapani Irioshi. ⁴ Iroguenti
 notsaque arimajaca yatsomajajitanaqueriquea

ontaniqui jenoqui paraisoqui,* ariquea oraniqui iquemagueque cantashitatiajencaro iquenquetsajencajitaquegueti, cotanquitsiquea teequea iragavejeji caquinte incante queroca icantajiqueni, teequea irininteji Aapani Irioshi intsavetantero. ⁵ Nagavejaque notsavetacoteri quempecarica, cotanquitsiquea aatoquea nosemetitsi, iroguenti nosemetacoquempaquea namenaquegueti teequea nagavejempaji. ⁶ Arimegueti noninquemegueti nontsavetacotaca maasano cameetsaguetatsica nantaguetaqueca, aatomequea querica agavejatsi incanque manaquea isemetaque intati, arimajacatari nocantamajati notsavetacotagueti. Cotanquitsiquea aatoja noquejetimatirotsijate imaica aatonijite pitiavaetacaantajigarotsi pishineventajianaquena, iroguentiquea noninque pishineventajiaquemparoja pamenaqueca nantaguetaqueca aisa nocanqueca.

⁷ Oraqueate yonigaimoquenaca Aapani Irioshi caaviji oganejencamajataca oacaavaequenaqueate intati, cotanquitsiquea iriatimpa teequea irininteji nosemete jero iticaarejantacarica Satanashi irantsipetacaavaequenaquea. Oquejevetacaquea otseji opirijapatitacoquena. ⁸ Tres nocantavecari Amajirote intsoparejacotajenaromequea aatonijite natsipevaetajatsi. ⁹ Cotanquitsiquea iriatimpa icanquena: “Aritaue ococani noncavintsajacoguitempini. Iroguenti

* **12:4** paraiso. Irinetajaquegueti tsaroventarica Aapani Irioshi, ari iroanaque ontaniqui paraisoqui, ari inchooaque irosati aapojempagueti savincaguiteri intancorejantana jempaca. Pamenero aisa Yonig. 2.7; Irc. 16.22; 23.43.

nonigaanquero nagavejane caquinte qui
 caarica agavejamajatatsi." Jero imaica
 noshinevaetantacaca nontsavetaquerogueti
 teequea inchiquiojita nagavejeji naatimpa,
 cameetsaniji iroguenti agavejacaamajaquenane
 iragavejane Quirishito. ¹⁰ Irootaquequea
 noshinevaetantanacaca namenaquegueti
 teequea inchiquiojita nagavejempaji naatimpa,
 aisa icantagushejitanaquegueti, natsipevae-
 tacagueti, aisa yatsipetacaavaequegueti
 catsimajiaquenaca, manaquea aisa taaca
 opajitapae tiavaequeguenaca natsipevencarigueti
 Quirishito. Namenaquetari oraquea
 teegueti nagavejeji naatimpa, choocaquea
 agavejacaquenaca.

Paavoro ishoshoventajiacari Corintoquitica

¹¹ Aviguentijiatarite quejetacaajiaquena imaica
 notsavetacotantacaca quempeca manaquea
 noshoncacoca, aviguentijamequea quenquetsa-
 tacoventanaquename pishineventajiaquename.
 Naatimpa arimajaca teequea taaca opaji
 nagavejempaji, cotanquitsiquea teequea iranaa-
 jiguenuaji irirajia tsavetantamampeajitsica
 pishineventajiacaca piquemisantajiaqueca
 pajitashitajatsica "itigarancanemajaca Jesoshi".

¹² Oraqueate nochoocaquitigueti aviatimpajiaqui
 notsavetantimojiaquitimpigueti natsipetacov-
 aecaroquea nonigaimoguevetaqueempirogueti
 oganejencaropae teeca iragavejeji caquinte
 oacaantantatsica intati pintsatimentajiaqueniji
 arimajaca naroguenti itigarancane Jesoshi.

¹³ Ariquea noquempetacaamajaquempi

maasano tsaroventajiatsica capiocapinijiatsica tsovironaqipaequi, apanivani arica pamenajiaquena tee nasereacotsitempi noncantajiaquempi pojocajiaquenaquea nocoguitejacoguetacaca. ¡Imaica iiintsija pimpeacotsitajenaro pamenajiaquenagueti noquempetaqueroquea imaica teequea taaca opaji namanajiguempiji!

¹⁴ Imaica noanaque namenajiaquitempiquea aisa. Oraqueate noanaquegueti irooquea trestapojatsineca namenajiajatempiquea. Cotanquitsiquea aatoja nasereseretimpitsi namanajiguimpitsi, teequea irooquea noashite pashintajiacaca, aviguentijiaquea noashijianaque nontampishitacaajiaque-mpiquea arimpaqueate pintsaroventamajatanaquempari Quirishito. Iriraquea irijanintajiatsica irioquea jocajiaquenerineca irijanijiate icoguitejacojiacaca, aatoquea iriatimpajia jocajiguiniritsi irijanijiate. ¹⁵ Naatimpa noshinevaequempaquea noncanquempa nonteroncacaamaquempiro maasanopae nashincaca, cotanquitsiquea aatoquea aparo noteroncacajaiguimpiroquea nashincaca, manaquea nonquejetanaquempaquea naatimpa nantsipeventajiaquempiquea pajinitia ometojanaquena magorentsi. Oncantacoguitempanigueti nompintsamajajianaquempi naatimpa, ¿arimpaqueate aviatimpajia capichajaniqui pimpintsavequena? ¹⁶ Iconoagarantajiaca catsimajiaquenaca, yamenajiaveca teequea noncantimatempiji pojocajiaquenajate nocoguitejacojiacaca, cotanquitsiquea icantajiaque:

“Teequea iramanajiavetempiji imentaquipae, cotanquitsiquea caaviji itsamajati yamatavijantigueti, jero teequea pamenacojiguempaji yaitsijiaquempirigueti pimentaqui sitepae.”

17 ¿Arimpate ariquea nocantajiaqueri irirajia notigarancajiaqueca iramenajiajatempiquea iramanamanavaequeempiniji pimentaqui site cameetsaniji naagarantavaqueniji naatimpa? **18** Coramani nocanqueri Tito iroaquitequea oraniqui iramenajiaquitempiquea. Oraqueate yoanaquegueti notigarancuitsitaquea itsipa apitsaroventarite intsipatanaquempaca. ¿Arimpate yamatavijijiaquempi Tito? Mavitepaetari naatimpajia ariquea noquempetavacaajiaca noquenquejajiguigueta, aisa ariquea noquempetavacaajiaca nantinirigueti Amajirote.

19 Oraqueate nocantajiaquempigueti imaica aviatimpajia arica pamenajiaque aricajate nonintajiaque nonijacoventajianaquempa, cotanquitsiquea teequea irooquea nonintajigueji. Yamaquenaqueate Aapani Irioshi manaquea noquempejiaqueroquea imaica cameetsaniji nontampishitacaajiaquempi arimpaqueate pintsaroventajianaquempari, aviguentijiaquea napitsaroventarijiate nopintsajiacaca, aisa iriguenti nintanquitsica Quirishito noquempetantajiacaroca imaica noquenquetsatacaaaji aquempi. **20** Otsaroneguintavaequequetaqueate namenaquequea arica noavetempagueti oraniqui namenajiavepojajempiquea cotanquitsiquea aato noshineventajiguimpitsi, iroompaquea ariquea pinquempejiaquempaquea aviatimpajia aisa aatoquea pishineventajianatsi.

Aisa arica manaqueate namenajiapojempiquea catsimatsatavacaajiaquempi, catsimajencata-
cotantajiaquempi, catsimatsitantajiaquempi,
aviguentijiaquea quenquejacojajatsi, tsojeven-
tantavacaajiaquempi, nijashitavacaajiaquempi,
nintajiaquempi panaimanatavacaajiaquempa,
aisa teequea pinquemavacaajiguempaji.

21 Otsaroneguintavaequitanaqueate na-
menaquequea noncoraquetajategueti aisa
namenajiajatempiquea arica manaquea
irovashiventajavaequenaqueate Aapani Irioshi
namenajiapojaxempiquea picaramirincavaeque
aviatimpajia teequeate povashiantajigueroji
pigovaeguisherejia, nintanatsiqueate poashitan-
tajiaquequea, aisa pipashinincajiaca irooca aisa
teequea pinejashitemparoji manquigarentsi,
ariquea niraacojiaguitempiniquea.

13

*Icanque Paavoro ininque irinetsanavaejiaque-
mpa*

1 Imaicaqueate imaica otrespojaque
noncoraquetantaquempaca namenajia-
jatempa. Otioncacaquea: “Choocagueta
mavite irioca 3 amenajiaquerica itsipa
icovaeguishecagueti, ariquea iroguenti
pincantomajitsitempariquea.”[◊] **2** Coramani
namenajiajatimpigueti nocantajiaquitiri irirajia
covaeguishejianquitsica irovashiantajianajeroja
maasanopae ipeacaagushejiacaca. Imaica
nochoocaveca osamani, cotanquitsiquea

[◊] **13:1** Ireo. 17.6; 19.15.

noncantsijajempariqueate iriatimpajia aisa maasano quericaca peacaagushejiacaroca covaeguisherentsipae, noncoraquetajategueti noncantomajamajajiaqueri. Aatotarite notsaroacaajigaritsi. ³ Pinintajiaqueterarite pamenajiaque arimajacaca iriotari Quirishito quenquetsatantacaroca novagantequi. Iriatimpaa teequea intsarogueji incatsimatimentajiaque-mpiroquea pipeacaagushejiacaca. ⁴ Oraquea yompajacojitaquerigueti quempeca teeca iragavejajeji, cotanquitsiquea arejetapojagueta ivochatajiri Aapani Irioshi yagavejacaajiri. Ariqueate noquempejiaca naatimpajia imaica teemajaca nagavejajigueji, cotanquitsiquea iriraquea Aapani Irioshi yagavejacaajiaque-naquea iquempetacaajiaquenariquea Quirishito yagavejacaquerigueti, irootaquequea nagave-jantajiaquempaca noncantomajajiaqueriquea peacaagushejiacaroca covaeguisherentsipae.

⁵ Lintsija pamenajajempaqueate aviatimpajia arimajacaca pitsaroventamajajiacari. Noncantsijajempiquea aisa iiintsijate pamenajajempajate. ¿Arimate teequea pintsajigueji ichoocashirentaquempi Jeso quirishito? Teugueta pintsaroventamampeajiguempariji intati, ichoocashirentaquempi. ⁶ Ariquea oquempetaca imaica noninque pintsajiaquequea arimajaca naatimpajia naroguentijia itigarancanejia Jeso quirishito, teequea naroguentijia amataajiatsica. ⁷ Namanacoventajiaquempi nocantajiaqueri Aapani Irioshi intampishitacaajiaquempiniji aatoniji pipeacaagushejarotsi taaca opaji covaeguisherentsi. Cotanquitsiquea teequea

ariquea noncantajigueji imaica cameetsaniji iramenajiqueroniji cameetsa nantajiaqueneriquea Amajirote, manaqueate nonintamajataquequea pincomajamajajiaquempajate. Iroompaquea aricagueti oshimerancavetapojempa incantacojivetaquenaqueate: “Teecajate iriguentijia itigarancanemajaca Jeso quirishito”, aviatimpajiaquea pincantacoguitempani pincomajamajajiaquempa.⁸ Teetari nagavejajigueji naatimpajia nonticaajiguero Iroomajatatsica, manaquea noninque nontampishiventajiaquero.⁹ Nonintamajajiaquequea pintsaroventamajajiaquemparija. Oraqueate arimajamegueti pintsaroventamajatemparimegueti noshinevaetaquempamequeate, aatomequeate querocaca ocojiganamequea naatimpajia pamenajiaquenaguetti teequea nagavejajigueji. Manaquea nintanatsi namanacoventajiaquempiquea cameetsaniji arimpaquea pintsaroventamajajianaquemparijate pincomajamajajianaquempaja.¹⁰ Irootaquequea notioncantajiaquempica ocatica paperi tequerataguetti noanoaiteji namenajiajatempiquea cameetsaniji pincomajamajajianaquempaniji aatoniji nocantomajamajatapojimpi. Iriraquea Amajirote itigarancaquenaqueate nontsatacaajiaquempiquea arimpaquea pintsaroventamajajianaquempariniji pintsipatavacaamajatanaquempaquea, aatoquea iroguenti novashiantacaajiguimpitsi pintsinampirejavacaajiaquempa.

Paavoro iteroncanajiro icantajiaquerica

11 Imaicaquea imaica, napitsaroventarijate, noninque pishinejiguempajate, aisa noninque pincomajamajajiguempajate. Pinquenquejaco-majateroja notioncajiaquempica imaica. Pinquemavacaajiaquempajate aatoja picatsimava-cajiatsi. Pinquempejiaquempagueti imaica intsipamajajiaquempiquea Aapani Irioshi, iriatimpa iriguenti pintsatantamajatantatsica, iriguenti choocataacaacajica cameetsa aatonijite taaca opaji ashoshoventajajatsi. **12** Netsana pinintavorotavacaavaquempa.* **13** Maasano ipeacaajiacaca Aapani Irioshi igomajamajarejia inintajiaque pinquemacojiaqueri chooca iquenquejajiaquempi.

14 Noninque incavintsajamajajiaquempiquea Amajirote Jeso quirishito. Aisa noninque pintsamajajiaquequea iriraquea Aapani Irioshi incoguitempani impintsamajajiaquempiquea, aisa Ishire intsipamajaquempiquea.

* **13:12** Netsana pinintavorotavacaavaquempa. Yamejiaca coramani inintavorotavacaajiacava yamenavacaajiacagueti, ari ique-jejiaca tsaroventajigarica Quirishito coramani.

**Iroaquerari Itioncacaantaqueca Aapani
Irioshi: Tsavetacoquerica Amajirote
Jesoquirishito**

New Testament in Caquinte (PE:cot:Caquinte)

copyright © 2008 Wycliffe Bible Translators, Inc.

Language: Caquinte

Translation by: Wycliffe Bible Translators, Inc.

Caquinte[cot], Peru

Copyright Information

© 2008, Wycliffe Bible Translators, Inc. All rights reserved.

This translation text is made available to you under the terms of the Creative Commons License: Attribution-Noncommercial-No Derivative Works. (<http://creativecommons.org/licenses/by-nc-nd/3.0/>) In addition, you have permission to port the text to different file formats, as long as you do not change any of the text or punctuation of the Bible.

You may share, copy, distribute, transmit, and extract portions or quotations from this work, provided that you include the above copyright information:

You must give Attribution to the work.

You do not sell this work for a profit.

You do not make any derivative works that change any of the actual words or punctuation of the Scriptures.

Permissions beyond the scope of this license may be available if you contact us with your request.

The New Testament

in Caquinte

© 2008, Wycliffe Bible Translators, Inc. All rights reserved.

This translation is made available to you under the terms of the Creative Commons Attribution-Noncommercial-No Derivatives license 4.0.

You may share and redistribute this Bible translation or extracts from it in any format, provided that:

You include the above copyright and source information.

You do not sell this work for a profit.

You do not change any of the words or punctuation of the Scriptures.

lix

Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

2014-04-22

PDF generated using Haiola and XeLaTeX on 11 Nov 2022 from source files
dated 29 Jan 2022

83ba253d-55c7-5686-b0d2-bfc8d1efc0d5